



BARREN
TOKIKOM

Gurpilera batzeko deia

Elgoibarko Lagun Taldea





ELGOIBAR STOCK KALE AZOKA



Urriak 1-2

10:00-13:00 eta 17:00-20:00

Postuak establezimendu atarietan egongo dira.



Parte hartzeko eta informazio gehiago eskuratzeko deitu 943 747 301 zenbakira.

SARA IRIONDO OTAÑO

Gizarte hezitzailea



Zuri, Adats

Aupa, Adats:

Zer moduzkoa izan da etxera itzuleraz? Zure arrainak bizirik jarraitzen al du? Baietz espero dut.

Niri arraroa egin zait buelta. Osaba-izebek eta gurasoen lagunek gauza berdina esaten didate denbora guztian: aine, zenbat luzatu zaren! Ni baino altuagoa zara eta! Badirudi beraiek betidanik helduak izan direla, baina, noizbait izango zituzten 14 urte, ez? Zeinen nekagarria! Benetan.

Bestela, besterik gabe. Oporretako motxila husteko daukat oraindik eta nire gela desastre bat eginda daukat. Puf! Laster gauza guztiak jasotzen hasi beharko naiz, bestela, errieta egingo didate eta, seguru.

Al Errekan harrapatu genituen zapaburuak bizirik iritsi dira. Eskerrak! Eskolako lanak egiteko erabiltzen dudana mahaian dauzkate eta azkeneko egunean eman zenedan argazkia ere bai. Begiratu eta Etxebe, Sami eta Dima ipurdi bistan ikusten ditudan bakoitzean ezin diot barreari eutsi. Zeinen ondo pasatu nuen egun hartan! Aizu, Usok eman zigun pultsera jantzita daramat oraindik! Zuk?

Bestalde, hasi zara klasera joaten? Nik aurreko astean izan nuen lehen eguneko aurkezpena. Oso gaizki pasatu nuen, aurreko gauetan ezin izan nuen

“Akordatzan al zara zuen kanpinean gaua pasatu genuen hartan nola gelako whatsapp taldetik atera ninduen batek?”

lorik egin eta goragaleak izan nituen goiz osoan zehar. Tripako minez jarraitzen dut, baina tira, hobeto nago. Ez dut inorekin hitz egin eta ez zait tokatu zaidan taldea gustatzen. Badakizu zein dagoen? Akordatzan al zara zuen kanpinean gaua pasatu genuen hartan nola gelako whatsapp taldetik atera ninduen batek? Ba hori! Ikaragarria. Ez daukat bihar klasera joateko gogorik, baina, orain hori tokatzen omen zaigu, eskolara joan eta ikastea. Etxean ez dut ezer komentatu, bestela galdera pila bat egiten dizkidate eta nik ez dakit zer esan. Eskerrak zuri behintzat kontatu diezazukedan.

Bueno, Adats, bizikleta garbitzera joan behar naiz. Ea urtea azkar pasatzen den eta lehenbailehen elkartzen garen denok berriz ere.

Laster arte!

Kima.



BARREN

ARGITARATZAILEA:



ELGOIBARKO IZARRA
Euskarazkoen Topagunea

Aita Agirre Kulturgunea, 3, 3. ezk. - 20870 ELGOIBAR

943 744 112

Publizitatea: 943 743 704

barren.publi@elgoibarkoizarra.eus

barren@elgoibarkoizarra.eus

www.barren.eus

BARREnek bere gain hartzen du espazio arazoengatik iragarkiak lekuz aldatzeko eskubidea. BARREnek ez du bere gain hartzen Iritzia, Hitz eta klik eta eskutitzak ataletan adierazitako erantzukizunik. **KOORDINATZAILEA** Ainhoa Andonegi **KAZETARIAK** Ainhoa Andonegi, Asier Orbea, Ainara Argoitia **HIZKUNTZA ARDURADUNA** Ainara Argoitia **PUBLIZITATEA** Leire Rubio **MAKETATZAILEA/DISEINATZAILEA** Zalaa Arnaiz **ATARI DIGITALEKO ARLO TEKNIKOAREN ARDURADUNA** Aitor lauzirika **ADMINISTRARIA** Amaia Arrizabalaga **KOLABORATZAILEAK** Eire Vila, Manu Sanchez, Iosu Juaristi, Iñigo Lamelas, Edurne Izagirre, Paula Heras, Enez Ezenarro, Ane Astiazaran, Irati Agirreazaldegui, Jone Olaizola, Juan Luis Mugertza, Izaro Etxegibel, Iñigo Otaño, Iñaki Goitia, Jose Ramon Cabrera, Alex Segade, Ane Kortaberria, Sara Iriondo, Asier Guisasaola **INPRIMATEGIA** Gertu Koop.E. **TIRADA** 4.885 ale **LEGE GORDAILUA** SS-1.038/92 ISSN 1138-1855

BABESLEA:



LAGUNTZAILEAK:



Gipuzkoako Foru Aldundia



BARRENeK ez du bere gain hartzen IRITZIA eta ESKUTITZAK ataletan adierazitakoen erantzukizunik. Eskutitzak ondo identifikatuta egon behar dute. Ez ahaztu izen-abizenak, NANA eta telefonoa jartzea. Bidali helbide honetara: barren@elgoibarkoizarra.eus

▶ EAJ-REN MEMORIA IBILBIDEA

2007an hasi ginen memoria berreskuratzeko bidean. Urte hortako abenduan atera genuen, Madarixan 5 metrotako zuloa egin eta gero, miliziano ezezaguna. Elgoibarko Udaletik ez zen inor etorri alderdi baten ordezkari; Alfredo Etxeberria (garaiko alkatea) etorri zen "a título personal" zetorrela esanda, ez EAJ bezala. Gerora, Zirardamendira ere joan ginen hobiak ikustera. Aitzurrean ere saiatu ginen ateratzen, baina ezinezkoa zen. Omenaldia egin genuen Markina-Etxebarriko Ahaztuen Oroimeneko lagunekin, kartelak kentzen zizkiguten bizilagun batzuek, hildakoak bakean uzteko esaten ziguten... Denetarik entzun behar izan genuen garai hartan.

2012an, Elgoibar 1936 eta Ahaztuen Oroimena taldekook, Aranzadiren laguntzarekin (horrela dio Aranzadiko informeak ere, batzuk datu hau ahaztu nahi izan badute ere), lau gudariren gorpuzkinak atera genituen. Hori guztia ezinezkoa izango zen Felix Etxeberria *Parapan* eta Bittoriano Agote gabe, eurek deitu zutelako Aranzadira lehengo, hobiak identifikatzeko asmoz. Felixek, gainera, beste hobi batzuk ere identifikatu zituen Elgoibarren.

Gorpuzkinak atera eta gero, sekulako oihartzuna sortu zen Elgoibarren, Urkullu lehendakaria etortzerainokoa. Dokumentala etorri zen gero, liburua...

Gu gustura geunden egindako lanarekin eta errekonozimendurekin, baina batez ere gustura geunden Zirardamendi

berriro Euskal Herriko mapan kokatu genuelako. 80 urtez guztiz ahaztuak izan ziren miliziano eta gudariak berriro ere gogora ekartzeagatik. Azken finean, hori zen gure lana eta lortu genuen gure helburua.

Domekan, ordea, "Memoriaren Ibilbidea" deritzon ibilbidearen aurkezpenan izan ginen. Eta penaz hartu genuen ikustea aurkezpena mitin politiko bihurtu zuela EAJk. Bertan hildako gudariez hitz egin beharrian, Unai Parrotez hizketan hasi ziren eta ETBn ez zuten ibilbidea aipatu ere egin.

Gu ez ginen EAJren mitin politiko batera gonbidatuak izan, eta gudari eta milizianoak alderdi intereserako erabiltzea oso larria eta maila baxukoa iruditzen zaigu. Zerikusirik gabeko gauzak nahasi eta giroa gaiztotu zuten ekitaldian, pertsona batzuek ekitalditik alde egiteraino. Lotsagarria iruditu zitzaigun.

Egoera honen aurrean, Elgoibarko Udalak zegoen konfidantza markoa hautsi du. Borondate osoa daukagu elkarlana sustatzeko memoriaren berreskuratzearen alde, baina horrelako ekitaldi bat alderdi interesekin erabiltzea nahi badute, gu ez gaude prest.

Elgoibar 1936

ESKUTITZEI BURUZKO ARAUDIA

BARRENeN edozein gutun argitaratu ahal izateko, honako baldintza hauek bete beharko ditu nahitaez:

1. Eskutitz guztiak identifikatuak egon behar dute: izen-abizenak, telefono zenbakia eta NAN zenbakia derrigorrezkoak dira.
2. 1.500 karaktere izan behar ditu gehienez eskutitzak.
3. Eskutitzak izen-abizenen inzialekin edota izen-abizenekin argitaratuko dira. Ezizenarekin ezingo dira sinatu gutunak. Onartu egingo ditugu identifikagarriak diren taldeak: "Ikastalako irakasleak", esaterako. Bestalde, sinatzailearekin batera beste lagun batzuk ere daudenean, hauek ere identifikatuta egon behar dute.
4. Pertsona eta erakundeek gutun-egilearen izen-abizenak jakiteko eskubidea izango dute gutun horretan euren izena aipatu edo erreferentziaren bat egiten bada eta gutuna inzialekin sinatuta badago.
5. Ez dira onartuko: biraok, gutun iraingarriak eta errespetu faltaz idatzitakoak, buzoneatzeko edo kale banaketa egiteko idatzitako idazkiak, pertsona eta erakundeek zuzenduriko mehatxuak...
6. Ez dugu gazteleeraz datorren eskutitzik argitaratuko.

BARRENeK harpidedunentzako oharra

Buzoiko **B** pegatina falta bazaizu edo hondatuta baduzu, BARRENeN bulegora etorri eta berria emango dizugu. Banaketa sistema errazteko behar-beharrezkoa dugu zuen buzoiak pegatinarekin markatzea. Mesedez, ez ezazue pegatina kendu buzoitik. Gure banatzaileek eskertuko dute.





Zuen kezak, galderak edo txaloak bidaltzeko: barren@elgoibarkoizarra.eus



943 744 112



688 634 044



Botila festaren ondorioak jasaten ditugu herri-
tarrok: "San Roke ermita ingurua horrela aurkitu genuen domeka goizez. Ez dago eskubiderik! Zabor edukiontzia metro gutxira egon arren, zikinkeria guztia botata lagatzen du jendeak. Eta ez da hau gunee bakarrik: Mintxeta ingurua, Gabriel Krutzelaegi, Albitxuri eta Sigmako industriguneak... Herriko gunee asko bilakatu dira botila festa egiteko lekuak eta dena zikinkeriaz beteta egoten da. Botila festak debekatuta dauden arren, agintariek ez dute ezer egiten horren kontra, eta niri iruditzen zait zerbait egin beharra dagoela".




Sigma auzorako espaloia zikin eta labain ego-
ten da: "Gurpildun aulkian nago, eta askori oharkabean pasatzen zaion arren, niretzako oztopo handia izaten da. Sigmán bizi naiz, eta herritik etxerako bidean traba asko gaintitu behar izaten ditut, eta espaloia hau izaten da horietako bat. Euriak lurra ekartzen du, eta lokatza eta ur putzua egiten dira gunee horretan. Eskertuko nuke kanalizazioa hobetzea gunee horretan, espaloia garbi mantendu dadin".

Udal bulegoetan argiak piztuta egoten dira arratsaldean: "Herritarren Arreta Bulegoko argiak piztuta egoten dira arratsaldeetan, eta bulegoa zabalik egoten dela ematen du. Argia hainbeste garestitu den honetan, iruditzen zait horrelakoak gehiago zaindu behar ditugula, eta beharrezkoa ez denean, argiak itzali. Denon artean aurreztu behar dugu energia". Udaletik azaldu dutenez, garbitzaileak egoten dira arratsaldean bulegoa garbitzen, eta beraien lana amaitzean itzaltzen dituzte argiak.



Txalo bat erraldoi eta buruhandien erakuske-
tagatik: "Siplea bezain polita! Erraldoi eta buruhandiak kalean ikusteko irrikitan gauden honetan, poz handia eman digu erakusketa ikusteak. Umeak liluratuta geratzen dira! Eguna joan eta eguna etorri, erraldoi eta buruhandiak ikusi nahi dituzte, eta haien irribarreak ikusita, gurasook ere gozatzeko dugu. Eta, zer esanik ez miniaturazko erraldoien erakusketari buruz! Txundituta geratu gara Gorka Alonso eta Idoia Ortigaren bildumarekin! Zorionak antolatzaileei".



Zabaldu dute Mendaroko ludotekan izena emateko epea



Agintzari enpresak kudeatu ditu azkeneko zortzi urtean Mendaroko ludoteka eta gaztelekua, baina aurrerantzean Durangoko Zientzikasi enpresak kudeatuko ditu. Duela hamabost egun bi begiraleren bila zebiltzan oharra plazaratu zuten, eta orain jakinarazi dute zabalik dagoela ludotekan izena emateko epea. Asiteheneetik eguenera arteko zerbitzua eskainiko dute bertan 4-10 urte bitartekoentzat (17.00-18:30) eta barikuetan 11-12 urtekoak hartuko dituzte, 17:00etatik 19:00etara. Interesatuak ludotekan bertan eman behar dute izena, eta 44 euro sartu beharko dute ondorengo kontu korronte zenbaki honetan: 2095 5054 011061225891. Ludotekako ikasturtea ekainaren 24an amaituko da.

Ludotekako eskaintzaren barruan, jarduera ezberdinak egin ahal izango dituzte umeek: eskulanak, Lego tailerrak, jokoak, sukaldaritza eta mugimendu tailerrak, mendi irteerak... "Helburua da Mendaroko haurrek herrian bertan aisialdi aukera ezberdinez gozatzeko aukera izatea".

Haitiko lurrikaran kaltetuei laguntzeko misioan da Pedro Perez mendaroarra

Richer eskalak 7,2 graduko indarra zuen lurrikara batek astindu zuen abuztuaren 14an Haiti, eta Gurutze Gorriak nazioarteko laguntza kanpaina jarri du martxan bertan. Kanpaina horretan ari da da parte hartzen Pedro Perez mendaroarra. Perezen eginkizunak edateko ura eskuratzen laguntzea eta saneamendu egokia eta higiena bermatzea izango dira, Gipuzkoako Gurutze Gorritik jakinarazi dutenez. Ez da lehenengo aldia Pedro Perezek Gurutze Gorriaren nazioarteko larrialdi kanpaina batean parte hartzen duena. Izan ere, gutxienez beste hiru misiotan izan da.



STOCK KALE AZOKAN

%30 %50

Deskontuak denboraldiz kanpo eta katalogoz kanpo dauden produktuetan.

San Roke kalea, 20 - Elgoibar - 943 744 457 - 685 756 978 - www.textillagunak.com



IKASGO ACADEMY

Aurrematrikula epea zabalik
2021-2022

INGELESEKO AKADEMIA

- Ingeles errefortzuak
- Cambridge azterketak
- Talde txikiak

Plazak libre!
Gorde zure lekua!

Basarte 13, beheka - Elgoibar - akademielgoibar@gmail.com

Maria Isabel Etxeberriak irabazi du balkoiak apaintzeko lehiaketa

Elgoibarko Udalak balkoiak apaintzeko lehiaketa antolatu du Debegesarekin elkarlanean, eta dagoeneko jakinarazi dituzte irabazleak: Maria Isabel Etxeberria Lizarraldeak irabazi du lehiaketa, eta bigarren saria Maria Antonia Caballerorentzat izan da. Txankakuako merkatarien elkarteko Elgoibarko saltokietan trukatzeko 200 euroko txekea jaso dute. Udalak 250 lore banatu zituen herritarren artean, eta guztira 17 lagunek hartu dute parte lehiaketan. Konposizioaren originaltasuna eta sormena, kalitate apaingarria, harmonia eta multzoaren diseinua, eta horiek mantendu eta egituratzeko lana hartu du kontuan epaimahaiak. Lehiaketaren helburua "udalerriko ingurumeneren eta estetikaren kalitatea hobetzen laguntzea" izan da.



Elgoibarko PSE-EEK esan du bera izan dela Udalbus zerbitzua bermatu duena

Ohar baten bidez erantzun die Elgoibarko PSE-EEK joan zen astean EH Bilduk egindako kritikei, eta esan du sozialistek "beti" aldarrikatu dutela "herritarrentzat hain beharrezkoa" den zerbitzu hori: "2019ko udal hauteskunde programan sozialistok auzoak eta hirigunea lotuko zituen garraio publikoa martxan jartzeko ikerketa eskatu genuen, eta legegintzaldi honen hasieratik zerbitzu hori martxan jartzeko lanean ari gara, botoa eman ziguten herritarrekin konpromisoa dugulako". Era berean, PSE-EEK esan du bera izan dela zerbitzua martxan mantentzea bermatu duena: "EAJk autobusa kentzea defendatu zuen, eta PSE-EEK lortu zuen EAJk iritiz aldatzea". Dena dela, zerbitzu hori hobetu egin behar dela uste du alderdi sozialistak, gaur egungoa "ez delako nahikoa". Bere ustez, bere jardura udalerrira osora zabaldu behar da, auzoetako bizilagunek ere erabili ahal izan dezaten. Ildo honetan, PSE-EEK "zorrozatasuna" eskatu dio EHBilduri kritika politikoan, eta azpimarratu du Udal Gobernuan "ausardiaz eta seriotasunez" jokatzeko ari dela, bizilagunen beharrei erantzuteko bere esku dagoen guztia eginez.

Bestalde, PSE-EEK bilera bat egin du Mugikortasuneko eta Lurralde Antolaketako diputatu Rafaela Romerorekin eta Mugikortasuneko eta Garraio Publikoko zuzendari Ander Iturriekin Udalbus zerbitzua Lurraldebuseko Mugi Sistemari sartzeko, eta elgoibartarrek txartel horren onurak eskuratu ahal izateko. Bilera horretan izan ziren, besteak beste, Ariana Nogales Elgoibarko Udaleko bozeramaile sozialista, Ane Beitia alkatea eta Josu Arraiz alkateordea.

"Salbuespeneko legedia" salatzen elkarretaratzeak egin zituzten zapatuan Elgoibarren eta Mendaron, Sarek deituta

Arrasaten egin asmo zuen martxaren ordean, elkarretaratzeak deitu zituzten Sarek Euskal Herriko hainbat herritan "konfrontamendurako espazioak" saihestearren. *Bizi osorako zigorrik ez! Giza eskubideak. Elkarbizitza. Konponbidea* lelopean, Euskal Herriko 50 bat herritan egin zituzten bilkurak, eta horien artean, Elgoibarren eta Mendaron ere egin zuten bat zenbait herritarrek.



Eguazteneko Osoko Bilkuran hartuko du Aitziber Aranberri Jon Peli Uriguenen lekua



Maiatzean iragarri zuen moduan, Jon Peli Uriguenek EH Bilduko bozeramaile kargua lagako du. Datorren eguaztenean egingo duten Osoko Bilkuran gauzatuko da erreleboa, eta aurrerantzean, Aitziber Aranberri izango da koalizioaren bozeramailea. Era berean, Jone Olaizola sartuko da zinegotzi.

Jon Peli Uriguen 2007an sartu zen Elgoibarko udalbatzan Eusko Alkartasuna alderdiko zinegotzi modura, eta hamalau urte egin ditu Elgoibarko Udalean. Zinegotzi izateaz gainera, Elgoibako EH Bilduko bozeramailea izan da azken urteotan, eta bera izan da koalizioko alkategaia azkenengo udal hauteskundeetan ere. 2011tik 2015era bitartean Berrikuntza, Landa Garapen eta Turismo Diputatua ere izan zen Gipuzkoako Foru Aldundian, eta gaur egun ere batzarkidea da Gipuzkoako Batzar Nagusietako EH Bilduren taldean. "Unea heldu da taldearen gidaritzara beste esku batzuetan uzteko hasieran Eako ordezkari gisa, eta gerora Bildu eta EH Bilduren barruan, duela 10 urte sortu genuen proiektu zirrargarri honetan. Ez da gure helburua politikan betikotzea", esan zuen Uriguenek kargua lagako zuela iragarri zuenean.

Gurasoentzako formakuntza saioak udazken-negurako

Elgoibarko ikastetxeetako guraso taldeek eta Udalaren Gizarte Ongizate Sailaren artean sortutako Guraso Formakuntza Taldeak hainbat formakuntza saio antolatu dituzte, adikzioen prebentzio programaren baitan. Saio hauetan, haur eta nerabeen egunerokotasunean babes faktore bilakatzen diren gaiak landuko dituzte, arrisku faktoreak murrizteko ahaleginean. Parte hartzea doan da, baina edukiera zaintzeko izena eman behar da, ondorengo helbideetan:

- <https://labur.eus/bQkRW> (euskaraz)
- <https://labur.eus/Yz6F9> (elebitan).

Hauek dira ikastaroak:

- "Gure seme-alaben eboluzio-etapak eza gutzen"
- "Autonomiaz garatu"
- "Mugetan trebatzen"
- "Emozioen kudeaketa gaur egunean"
- "Autoestimua, empatia eta asertibitatea"
- "Sare-sozial eta aplikazio erabilienak: onurak eta arriskuak"

Ikastaroei buruzko data eta ordutegi zehatzak ezagutzeko www.elgoibar.eus webgunea kontsultatu daiteke.

Aita Agirre kulturgunea morez argiztatu zuten eguaztenean, Alzheimerren Nazioarteko Egunean

Irailaren 21ean Alzheimerren Nazioarteko Eguna izan zen, eta horrekin bat eginez, morez argiztatu zuten Aita Agirre kulturgunea.

Honi lotuta, AFAKI elkarteak ki-deek (Gipuzkoako Alzheimerdun pertsonen familiakoen elkarteak), Elgoibarko Udalarekin elkarlanean, Alzheimerren eta bestelako demenzien inguruko informazioa emateko bi mahai informatibo ipiniko dituzte zapatuan, irailaren 25ean, Elgoibarren, Kalegoen plazan bata eta San Frantzisko kalean bestea.



Edoskitzeari buruzko argazki lehiaketa zabaldu du ESI Debabarrenak

Edoskitzearen inguruko argazki lehiaketa jarri du martxan beste urtebetez ESI Debabarrenak eta azaroaren 14ra arte egongo da parte hartzeko aukera. Argazkiak originalak izan beharko dira, eta parte-hartzaile bakoitzak gehienez hiru aurkeztu ahal izango ditu, koloretan nahiz zuri-beltzean. Argazkiarekin batera, parte-hartzaileek izena emateko dokumentua bete eta irudia biltzeko eta zabaltzeko baimena sinatu beharko dituzte. Irabazleari abenduan emango diote saria, ospitalean egin ohi duten errekonozimendu ekitaldian. Argazkiak bidaltzeko: BPSO.OSIDEBABARRENA@osakidetza.eus.



Herriko Enparantzako zoruan ez labaintzeko tratamendua eman dute, Mendaron

Herritarren kexei erantzunez, Herriko Enparantzako zoruan ez labaintzeko tratamendua eman dute asteon, Mendaroko Udaletik jakinarazi dutenez. 1.500 metro koadroko inguruko inguruan eman dute tratamendu hori. Lehenengo, desinkrustagailu industrialak aplikatu dituzte. Ondoren, ez labaintzeko soluzioa aplikatu dute zoladuraren gainean porositatea sortzeko, eta azkenik, hondarra kenduko dute desinkrustagailu industrialen aplikazio batekin.

Zabor-bilketaren tasa eta IBIa ordaintzeko epea irailaren 30a artekoa da Mendaron

Mendaroko Udaletik jakinarazi dute datorren irailaren 30era arteko epea dagoela bigarren seihilekoko zabor-bilketaren tasa eta IBI iraunkorra borondatez ordaintzeko. Helbideratutako ordainagiriak zuzenean kobratuko dituzte. Ordainagiriak helbideratu gabe dutenek, berriz, banketxean edota udaletxean bertan egin beharko dute.

aldaz
hortz klinikak
RPS233/13
Tel.: 943 366 377
San Bartolome, 22
20870 Elgoibar

NATUR HOUSE
Ainara Iriondo Ansola
GIZA ELIKADURAN ETA
DIETETIKAN DIPLOMATUA
Toribio Etxebarria, 22
Elbar
677 551 850

fisio&mas
Fisioterapia aurreratua eta
Kirol Berregokitzea
Trenbide kalea, 13
943 740 191 / 667 934 028
www.fisio-mas.com
IBS 877.18

RPS 183/12
Uzuri
optika audio
Elgoibar
Tel.: 943 740 359
Deba
Tel.: 943 192 192

FUB Fernando
Urizar
Barandiaran
R.P.S.: 32/17
Medikuntzan doktorea
Psikiatrian espezialista
Psikoterapia psikoanalitikoa
Psikosomatika
Ego-Gain kalea, 18-1A (Elbar)
Ballen kalea, 9, 1, ezk. (Bilbo)
furizarf@yahoo.com
615 715 404

**leku
eder**
hortz klinika
RPS 171/12
Elena Herrero Lobo
Aita Agirre Enparantza, 5
20870 Elgoibar (Gipuzkoa)
Tel.: 943 530 053

federópticos
ikus
RPS 65/07
San Bartolome, 10
Tel.: 943 743 734

RPS 271/12
ainhoa
fisioterapia
Jausoro plaza, 6 behea
Elgoibar
943 531 953
669 565 745



Elgoibarko Lagun Taldea, lagun gehiagoren bila

Zulo batzuk estali dituzte eta hogeitau urte baino gehiagoko auto zaharra, azkeneko bi urtean gelditu egon dena, jarri dute berriro martxan lasterketarako. Laboral Kutxa / Euskadi Fundazioak beste urtebetez jantziko ditu goitik behera eskolako txirrindulari gazteak eta BESA Bernardo Ecenarroren babesletza ere lortu dute. Arnasa hartu dute, eta zailtasunak zailtasun, ilusioz begiratzen diote etorkizunari. Bideorria zehaztu du Elgoibarko Lagun Taldeko zuzendaritza berriak, eta urtarrean hasiko duten denboraldi berriari begira, hasi dira txirrindulari gazteak erakartzen.

- AINARA ARGOTIA -

Elgoibarko Lagun Taldean zuzendaritza-taldea aldatu zuten maiatzean, eta lan egiteko modua aldatzeko konpromisoa hartu ere bai. Izan ere, ez dute egoera erraza bizi Elgoibarko txirrindularitza eskolan. Diru-kontuak ez dira onak, zorrak pilatu dira [3.000 euroko zorra dute oraindik kitatzeko], zailtasunak asko dira, baina ilusioak beti lautzen du bidea eta itxaropen-tsu daude. Mendarotxirrindulari Elkarteko Alex Aranberrik eta

Raul Santamartak, Elgoibarko eskolaren bueltan ibilitako Jorge eta Iban Gonzalez anaiek eta Antonio Moreno Tonik osatzen dute gaur zuzendaritza-taldea [Morenok ordezkatu du Juan Ramon Bellon presidente karguan], baina lantaldea handiagoa da. Taldeko dira, esaterako, Tomas Salegi eta Felipe Calleja Elgoibarko Lagun Taldeko erreferenteak eta Debako Amaiak-bat txirrindulari taldeko Alaitz Zubiaurre ere, zeinak komunikazioaren ardura hartu



duen, besteak beste sare sozialena. Helburu beraren bueltan elkartu dira guztiak: klubaren ekonomia onbideratu nahi dute, kudeaketa zorrotz baterako neurriak ezarri, txirrindulari eta bazkideen datu-basea sortu eta oinarri-oinarritik hasi lanean. Eta guzti horretarako Laboral Kutxa / Euskadi Fundazioaren laguntza izango dute beste urtebetez, eta baita Bernardo Ecenarrorena ere. "Estimatzen diegu egoera zail honetan gugan sinistu izana", nabarmendu du Alex Aranberrik. Laboral Kutxa / Euskadi Fundazioak arropa emango die beste urtebetez, eta BESAK diruz lagunduko du txirrindularitza eskola. "Arnasa eman digu; pago handi bat, arnasten jarraitzeko, beharrak asko direlako".

Gaur egun, Debabarrenean aktibo dagoen eskola bakarra da Elgoibarkoa, Gipuzkoako zatian. Aktibitatea, baina, ez da askok nahiko luketena. Txirrindularien gurasoen ahotan ere sarri ibili da gaia, eta eskolak berak ere ez du garai bateko sonarik inguruan. Asko dago egiteko, baina pausoz pauso joan nahiko lukete zuzendaritza berrikoek. Hasteko, txirrindularitza denboraldia

amaitzeaz den honetan, txirrindulari gazteak erakartzeko kanpaina hasi dute. "Harrobia sendotu nahi dugu. Gaztetxoei beste kirol bat probatzeko aukera eman, eta haiekin lan egin. Gure kirol honek merezi du-eta", zehaztu du Raul Santamartak.

Urtarrilean hasiko dute denboraldia txirrindularitzan eta momentuan 26 neska-mutil daude izena emanda: 9 urtera arteko lau (mendarokoa bat), 10-11 urte bitarteko sei (hiru Mendaroko), zortzi infantil (Bi Mendaroko) eta hiru junior (1 Mendarokoa). Pozik daude arduradunak kanpainak lehenengo egunetan izan duen harrerarekin, baina izena emandakoen kopurua txikia da beste kirol batzuetako zenbakiekin alderatuz gero, zer esanik ez nesketan, eta ari dira amu bila. "Duela pare bat urte, Arno guraso elkartearekin hitz eginda, Mendaro ikastolara ere etorri ziren Elgoibarko Lagun Taldeakoz zapatu goiz batzuetan txirrindularitza ikastaroak ematera, eta uste dugu bidea hori dela. Aurten ere badaukagu asmoa urria-azaroa bueltan eskoletara jotzeko, txirrindularitza ikusgarri egiteko bide eraginkorrena dela iruditzen zaigulako", zehaztu du Alex Aranberrik.

Aitortu dute, hala ere, zaila duela txirrindularitzak gaur nagusi diren kirolekin lehiatzea. Arrazoiak askotarikoak dira, baina hiru aitatu dituzte. Batetik, beldurra. Guraso askori erreparoa ematen dien kirola da, arriskuarekin lotzen dutelako. "Eta ulertzekoa da, hein batean. Guk geuk ere bizi dugulako gure azalean. Ibilitakoak gara geu ere bizikletan eta egunero gabiltza, bestela ere, errepidetan". Haurren agendak irailean lotzen hasteak ere badu eraginik. Txirrindularitza denboraldia urtarrilean hasten da, baina ikasturtea hastearekin batera hasten dira gainerako kirol jardueretan eta bestelakoetan izen-emateak, eta denera ezin da iritsi. "Burrutuan txirrindularitza besterik ez duenak itxarongo du, baina gainerako guztiak probatzeko aukera gabe gelditzen dira".

Eta Eskola Kirolari lotutako kezka ere badute, jakina. Aranberrik azaldu du Gipuzkoako Txirrindularitza Federazioko eta Gipuzkoako Foru Aldundiko ordezkariak bilera ugari egin dituztela eskola kirolaren barruan txirrindularitza kirol nagusien multzoan sartzeko eta onartu dutela, era berean, txirrindulari elkarten aspaldiko eskaera bat ere: benjaminei ere lehiatzeko aukera ematea. "Orain gertatzen zaiguna da, txirrindularitzan, benjaminek [9-10 urtekoek] ezin dutela lasterketarik jokatu, baina aldiz, adin horretako umeak lehiatzen direla beste kirolekin. Eta denok dakigu

lehia pizgarri bat dela. 2022an, baina, lehiatu ahalko dira. Kontua da Federazioak eta Aldundiak nahi dutela haurrei txirrindularitzako espezialitate ezberdinak probatzeko aukera ematea eskola kirolaren barruan (BMX, ziklokrosa, pista...) eta guk, elkarte bezala, ez dakigula nola erantzun ahal izango diogun horri guztiari".

Zailtasunak, baina, gainditzeko

*Urtarrilean hasiko dute
denboraldia txirrindularitzan,
eta momentuan
26 neska-mutilek eman dute izena
Elgoibarko Lagun Taldean*

daude. Eta etorkizunera begira jarrita, garbi dute zer lortu nahiko luketen. "Elgoibarkoa izanda hemen eskola bakarra, nahi genuke inguruko herrietako txirrindularitza elkarteek euren sentitzea hau eta elkarrekin aztertzea eta erabakitzea harrobia sendotzeko bidea". Gaur ere, Mendarokoak, Elgoibarkoak eta Debakoak daude talde-eragilean eta ezinbesteko ikusten dute harreman hori estutzea, eskola haziko bada. "Kantitatetik lortuko dugu kalitatea", dio Aranberrik, eta denboraldi berriari begira gogoeta egin du: "Aurten zortzi txirrindulari izan ditugu infantiletan eta bik edo hiruk ez beste guztiek laga egingo dute txirrindularitza". Ez dute, alegia, kadeteetarako saltoa emango. Urtero gertatzen den kontua da. "Kadeteak astean lau-bost egunez entrenatu behar dira, sakrifizioa handia da, eta gauza batzuk utzi behar izaten dituzte txirrindularitza jarraitu nahi izanez gero. Hemen, urtarilean hotz egiten du gainera bakar-bakarrik errepidera irteteko eta daukagun 634 errepide hau ere ez da entrenatzera irteteko onena". Ataka horretan, neska-mutiek beste kirol baten alde egiten dute normalean, bizikleta lagata. Klub edo talde onenetan ere gertatzen da, eta horregatik premiazkoa irizten diote elkartu eta gogoeta egiteari. "Hori saihesteko mekanismoak jarri behar ditugu martxan", zehaztu du Aranberrik, kadeteen eta jubenilen ardurua hartuko duenak. Aurten bi mutil lehiatu dira kadeteen bigarren mailan Elgoibarko Laboral-Kutxa taldean, Beñat Fernandez mendarorria eta Jokin Amorrosta eibartarra, eta joan zen zapatuan jokatu zuten Elgoibarko Lagunak Taldearen barruan azkeneko lasterketa, datorren urtean afizionatuetan lehiatuko direlako.

Gaztetxoagoetan gehiago dira kopuruz. Toni Morenok zuzenduko ditu gaztetxoak. Denboraldia amaitu bezain laster, talde guztiak desegingo dituztela aurreratu du Aranberrik, eta hutsetik hasiko direla, gurasoak bilera batera deitu ondoren. Abenduan hasiko dira entrenatzen, urtarilean hasiko dira industrialdeetan entrenamendu teknikoagoak egiten eta martxoan hasiko dira lasterketak jokatzeko. Eta horretarako guztirako, gurasoen laguntza ezinbestekoa izango dutela aurreratu dute klubetik. "Hala ulertu dugu beti txirrindularitza eta elkar hartuta egin nahiko genuke aurrera ere. Horregatik, aldeztu aurretik, doala hemendik gure esker ona babesle, laguntzaile eta txirrindulari eskolako guraso eta lagun guztiei".



Benjaminak.



Alebinak.



Infantilak.



Kadeteak eta juniorrak.

Oharra: 9 Urtez gorako gazteak hartzen dituzte Lagunak Taldean, eta izena emateko ondorengo bi telefonoetako batera deitu behar da, edo bestela e-maila idatzi, beheko posta elektronikora

659 332 673 (Toni)
646 265 862 (Alex)
elt_txe@hotmail.com



Jose Esnaola Alcibar

2021eko irailaren 19an hil zen, 69 urte zituela.
Sendiak bihotzez eskertzen ditu jasotako doluminak,
bai eta hileta elizkizunetara agertu izana ere.



Felix Balzola Astarloa

2021eko irailaren 21ean hil zen, 93 urte zituela.
Sendiak bihotzez eskertzen ditu jasotako doluminak,
bai eta hileta elizkizunetara agertu izana ere.



Mercedes Fernandez Penedo

"King Kong taberna"

2021eko irailaren 21ean hil zen, 85 urte zituela.
Sendiak bihotzez eskertzen ditu jasotako doluminak,
bai eta hileta elizkizunetara agertu izana ere.

***Beti izango zara
gure argia***

Etxekoak





Elgoibarko Memoriaren ibilbidea aurkeztu dute, polemika artean

Gertaera garrantzitsuen lekuko izan zen Aiestia 1936ko gerran, eta gertaera haien usaina nabari da gaur ere. Frontoiaren erreboteko hormaren atzeko aldean, 'Goazen gudari danok' horma-irudi handia dago, eta haren ondoan, 36ko gerran tropa matxinoen kontra borrokatu ziren gudari eta milizianoen oroimenez landatutako arbola, Gernikako arbolaren kimua. Bada, handik bertan, Menditxo baserriko atari aldera, jarri dute Memoriaren Ibilbideko paneletako bat. Eta hantxe, kartel horren aurrean, aurkeztu zuten domekan Gogora Institutuak eta Elgoibarko Udalak sustatutako Memoriaren Ibilbidea, 36ko gerran Zirardamendin hildako gudari eta milizianoak omentzeko urtero egin ohi duten ekitaldiaren baitan.

- AINARA ARGOTIA -

Ane Beitia alkateak, Beatriz Artolazabal Berdintasun, Justizia eta Gizarte Politiketako sailburuak eta Patxi Juaristi historialari eta EHUko soziologia irakasleak hartu zuten hitza, baina aurpegi ezagun gehiago ere izan ziren ekitaldian. Hantxe ziren, esate baterako, Jose Antonio Rodriguez Ranz Giza Eskubide, Bizikidetzeta eta Lankidetzako sailburordea; Jon Gamba Gipuzkoako Aldundiko Giza Eskubide eta Kultura Demokratikoko zuzendari nagusia; Elgoibarko Udalean ordezkariak duten EAjko, EHBilduko eta Podemoseko ordezkari eta militanteak; 36ko gerran zeresan handia eman zuten zenbait udalerritako agintariak, besteak beste, Mungiako, Turtziozko, Zallako, Markina-Xemeingo, Berritxuko eta Etxeberriako alkateak eta Eibarko eta Berangoko Udaleko ordezkariak; eta memoria historikoaren aldeko Elgoibar 1936taldeko Hodei Otegi eta Iñaki Odriozola.

Ane Beitiak egin zituen atarikoak. Alkateak azaldu zuen Altzoatik Kalamuara arteko ibilbidearen zati bat dela domekan aurkeztutakoa, Aiestiatik Zirardamendira artekoa, eta Elgoibarko Olaso hilerrian duela zazpi urte eraiki zuten Duintasunaren Kolunbarioak ixten duela memoriaren Elgoibarko ibilbidea. Patxi Juaristi historialari eta EHUko irakasleak eman zituen argibide historikoak. Juaristik nabarmendu zuen Euskal Herrian jazo ziren gertaera historiko garrantzitsuenen lekuko izan zirela inguru hauek 1936ko gerran. Izan ere, Kalamua, Urkaregi, Zirardamendi eta Aiestia inguruetan gudari eta milizianoek tropa frankisten kontra egindako

ahaleginak ahalbidetu zuen gorte errepublikanoek Euskadiko Lehen Autonomia Estatutua onartzea (urriaren 1ean), Eusko Jaurlaritza bera sortzea (urriaren 7an egin zuen zin Jose Antonio Agirre lehendakariak), eta gure administrazioaren erakunde publiko batzuk sortzea ere, besteak beste lehenengo unibertsitate publikoa. Errefuxiatuak (batez ere haurrak) sorosteko laguntza-sarea ere orduan antolatu zuten, 1936ko urritik 1937ko ekainera bitartean.

Gudari eta miliziano haiek egindakoa goratu zuen Berdintasun, Justizia eta Gizarte Politiketako sailburu Beatriz Artolazabalek ere, eta esker on hitzak izan zituen gerran "Euskadiren eta askatasunaren alde" borrokatu zirentzat, bai eta memoria historikoren alde ari diren pertsona eta erakundeentzat ere. Era berean, eta Euskadiko Memoria Historiko eta Demokratikoaren Legearen proiektua aipatuz esan zuen Elgoibarko ibilbidea "mugarri bat" dela memoriaren lekuen eta ibilbideen proiektuan. Elgoibarko "mugarri" honek konpromiso bat ere badakarrela nabarmendu zuen sailburuak. "Mugarri honek konpromiso bat dakar Euskadiko gerrako beste ibilbide eta eremu bereziki esanguratsu batzuekiko, bai Gipuzkoa eta Bizkaia artean egonkortutako frontearen alde horretan, bai beste lerro eta fronte batzuetan".

Eztabaida sortu zuten adierazpenak

Ekitaldira batutakoek adi entzun zituzten hitzok, baina izan zen tentsio unerik ere Artolazabalen hitzartzeak iraun zuen bitar-

KRONOGRAFIA LABURRA

tean. Saillburuak esan zuen gudari hitza "balioetsi" nahi zuela, azkeneko hamarkadetan "zikinduta" egon dela arrazoituta, eta Unai Parot presoari aipamena eginez hauxe esan zuen, gaztelerez: "Ozen eta argi hitz egin nahi dut. Henri Parot ez da sekula gudari bat izan. Henri Parot hiltzaile bat da. Lehen eta orain argi utzi nahi dugu ez gaudela biziarteko kartzela-zigorren alde, ez Henri Parot bezalako ETako hiltzailerik gosetienentzat, ez beste krimen gaitzesgarri batzuk egin dituztenentzat ere. Aste konplikatu izan da, baina gelditu nahi nuke Iciar Bollainen *Marixabel* filmak transmititu digun itxaropenarekin". Adierazpen horiei txistuka erantzun zieten ekitaldira bildutako zenbaitek, eta bakarren batzuek alde ere egin zuten. Elgoibar 1936 taldekoek ere gaitzetsi zituzten iluntzean Artolazabalen berbak eta gudari eta milizianoen aldeko ekitaldia "alderdi interesen alde" erabiltzea egotzi zioten EAJri. "Gu ez ginen EAJren mitin politiko batera gonbidatuak izan, eta gudari eta milizianoak alderdi interesetan erabiltzea oso larria eta maila baxukoa iruditzen zaigu. Zerikusirik gabeko gauzak nahasi eta giroa gaiztotu dute ekitaldian", zabaldu zuten euren blogean. Horren hariara, Elgoibarko Udalak "konfiantza markoa hautsi" zuela nabarmendu zuten: "Borondate osoa daukagu elkarlana sustatzeko memoriaren berreskurapenaren defentsan, baina horrelako ekitaldi bat alderdi interesekin erabiltzea nahi badute, gu ez gaude prest". Adierazpenon ondotik, domekako ekitaldira gonbidatuta zeuden Markinako Ahaztuen Oroimena taldekoek ere bertxiotu zituzten Elgoibar 36 taldekoen hitzak, astelehenean. "Memoria oso eta kolektibo bat eraikitzeko, ezinbestekoa da egiak errespetatu eta elkarlanean jardutea. Justizia trantsizional oso bat egikaritze bidean", gehitu zioten Elgoibarko taldekoek zabalduetako txioari.

Nolanahi ere, domekako ekitaldia ez zen Memoriaren Ibilbidearen aurkezpenean amaitu. Aurkezpenak eginda, Ane Beitiak eta Beatriz Artolazabalek lore-sorta bat utzi zuten Aiastiako frontoi ondoan dagoen Gernikako arbolaren kimuaren ondoan, eta ondoren, eta urtero legez, Zirardamendirantz abiatu ziren ekitaldira batutakoak, oinez. Zirardamendiko hobietan krabelin bana utzi zuten, eta Zirardamendiko gurutzea dagoen lekurainoko hiru geldialdietan Iñaki Goiogana historialariak desobiratzeen inguruan emandako azalpenak entzun zituzten. Jose Maria Otxoa de Trintxetu eta Jose Landa [Sabino Arana batailoiko gudari izandakoak] jarri zuten gurutzea 1952an, Zirardamendin galdu zituzten laguneren gorpuak ehortzita zeuden lekutik gertu.



Beatriz Artolazabal saillburua, Ager Izagirre Mungiako alkatea eta Ane Beitia Elgoibarkoa, domekan.

- **1936ko irailaren 13an** hartu zuten gobernu errepublikarraren kontra matxinatuek Donostia eta hamazazpi egunen buruan iritsi ziren Elgoibarrera, irailaren 21ean, 18:30ak aldera. Azkar egin zuten Gipuzkoan aurrera tropa frankistek, eta gureru iritsi bezperan elgoibartar ugarik egin zuten ihes Bizkai aldera, haien beldur.

- **Irailaren 22an**, berriz, zenbait gudari, miliziano eta Asaltoko guardiak Kalamua alderako bidea hartu zuten Markinatik, matxinoen kontra egiteko.

- **Irailaren 23an** hasi ziren inguru horretan lehenengo bonbardaketak. Gipuzkoa zein azkar hartu zuten ikusita, pentsatzekoa zen Bizkaian ere ez zutela eragozpen handirik izango aurrera egiteko, baina Kalamua, Urkaregi, Zirardamendi eta Aiastia inguruan gogor hartu zituzten gudari eta milizianoek, eta zaildu zieten aurrera jarraitzea. Egunetan borroka gogorak izan ziren, baina irailaren 24koa "bereziki gogorra" izan zela aipatu zuen Juaristik. Egun horretan, Arana Goiri batailoiko gudariak (Garaizabal konpainiako eta Zubiaur Konpainiako bi sekzio zehazki) Urkaregi gainera igo ziren, erreketean kontra borrokatzera. Han, Konpainia sozialista eta anarkistekin, Garellanoko soldaduekin, Asaltoko guardiekin eta beste gudari batzuekin bat egin zuten, eta Sabino Arana batailoiko sei gudari hil ziren borroketan, hain justu ere Zirardamendin hobiratu zituztenak. Ondorengo egunetan beste zortzi hil zituzten, guztira hamalau: Juan Agirre, Emeterio Llavori, Jose Txintxurreta, Paulino Beraza, Juan Zabala, Blas Larrazeleta, Ambrosio Etxebarria, Felipe Elorriaga, Sabin Atutxa, Eusebio Gaubeka, Imanol Etxebarria, Marcelino Gandarias, Miguel Palacio eta Felix Arbulu ziren.

- **Irailak 24-28.** Erasoeak eta borrokek jarraitu zuten. Irailaren 25ean ere bajak izan ziren.

- **Irailaren 27-28ko** borroka hain izan ziren "basatiak" gudari eta milizianoek Markinarako bidea hartu zutela, zereginik ez zutelakoan.

- **Irailaren 28rako**, Diez de Rivera komandante matxinatuaren soldaduak jaun eta jabe ziren Kalamuan, Urkaregin, Aiastian eta Arraten. Irailaren 29an, errepublikazaleek gogor eraso zuten galdutako eremua berreskuratzeko, baina frankistak ez ziren euren posiziotatik mugitu.

Hurrengo egunetan borroka gogorak izan ziren Kalamua eta Arrate bueltan, eta urriaren 8an, frontea gelditu egin zen, zazpi hilabetez. Bizkaia "babestuta" gelditu zen orduan eta horrek ahalbidetu zuen gure administrazioaren erakunde batzuk sortzea eta erre-fuxiatuei laguntzeko nazioarteko-sarea antolatzea.



Arg.: Marian Gonzalez

Laia Polo, Ainhoa Mugerza eta Joseba Astigarraga.

404: sormena eta autoezagutza lantzeko karta jokoa

Joseba Astigarraga eta Ainhoa Mugerza elgoibartarrek eta Laia Polo oñatiarrak Konekta proiektua sortu zuten iaz, eta proiektu horren helburu nagusia gaztetxoek beren burua ezagutzea da. Konexio sortzaileak dira, eta euren ustez, konektatzea enpatizatzea da; mundua besteen begietatik ikustea. Konektatzea, bilatzea, aurkitzea eta indartzen gaituenarekin lotura ezartzea dute oinarri, eta horretarako 404 karta jokoa sortu dute.

- AINHOA ANDONEGI -

Mondragon Unibertsitateko LEINN (Lidergotza Ekintzailertza eta Berrikuntza) graduko 4. mailako ikasleak dira Joseba Astigarraga eta Laia Polo. *Learning by doing* ikasketa sisteman oinarritzen da gradua, hau da, egiten ikastea, eta ikasketak hasteaz bat, enpresak sortzen dituzte ikasleek. Duiit enpresa sortu zuten 12 lagunek 2018an, eta horren barruan hainbat proiektu dituzte martxan. Iaz, Konekta proiektua jarri zuten martxan Josebak eta Laiak, Ainhoa Mugerza pedagogoarekin batera, hezkuntza sistemak dituen hutsune edo gabeziak betetzeko asmoz. "Hezkuntza sisteman irakasten, lantzen eta garrantzirik ematen ez zaien hainbat konpetentzia eta gaitasun" identifikatu zituzten, eta horiei erantzuna emateko beharra somatu zuten. Ikusi zuten hezkuntzak ez dituela norberaren konpetentzia eta gaitasunak lantzen, eta askotan gazteek ez dakitela zeintzuk diren:

"Gazteek nortzuk diren jakin eta onak zertan diren jakin behar dute etorkizuneko erronka desberdinei aurre egiteko". Gabezia horri erantzuteko 404 karta joko didaktikoa sortu dute. Sormena garatzen duten bitartean, gazteei beren gaitasunak detektatzen laguntzen dien karta jokoa da 404. Interneteko webguneek arazoak dituztenean 404 errore kodea ematen dute askotan, helbidea aurkitu ez dela adierazten duen errorea da eta *not found* jartzen du askotan. Horri keinua egin nahi izan diote gazte ekintzaile hauek karta jokoa izenarekin, nolabait esateko gazteengan oraindik gertatu ez den errore hori sahiestu nahi dutela aditzera eman.

Ainhoa Mugerza izan dute bidelagun proiektu honetan, eta berak lagundu die karta jokoa pedagogikoki lantzen. Pedagogian lizentziatua da, eta emozioen inguruan egin zuen ikasketa amaie-






rako proiektua. Bera aritu da marketing lanetan eta ikastetxeekin harremanetan.

Karta jokoa konekta sisteman oinarritu dute: Bi teoria fusionatzen dituen sistema da Konekta. Batetik, Howard Gardner psikologoaren adimen askotarikoen teoria hartu dute, pertsonen adimen bat baino gehiago izateko ahalmena dugula defendatzen duena, eta, bestetik, Osasunerako Mundu Erakundeak atera zuen bizitzarako trebetasunen eredu. Garapen pertsonala, gizarteartzea eta arrisku psikosozialen prebentzioa sustatzea helburu dituen hamar trebetasun zerrendatu zituen erakundeak.

KONEKTA SISTEMA





Gizakia bizitzan integratuta sentitzeko 10 trebetasun zerrendatu zituen OMEk, eta horietatik bost aukeratu dituzte. Howard Gardner (AEB, 1943) psikologo eta ikerlariak, aldiz, adimen askotarikoen teoria landu zuen, eta bizitzan arrakasta edukitzeko zortzi adimen mota zerrendatu zituen. Zortzi horietatik lau aukeratu dituzte. Bi teoria horiek uztartuta osatu dute Konekta sistema, eta hori da karta jokoen oinarria.

OMEren bizitzarako trebetasunak:

-  **Enpatia:** Besteen azaletik mundua ulertzeko abilezia.
-  **Komunikazioa:** Barruan daukaguna kanpora erakusteko abilezia.
-  **Egoera larrien kudeaketa:** Bizitzan zehar topatzen ditugun egoera larriak ondo kudeatzen jakitea.
-  **Auto ezagutza:** Norbere burua ezagutzea. Norberaren indargune eta ahultasunak zein diren jakitea, etorkizuneko erronkei aurre egiteko.
-  **Sormena:** Etorkizun bat sortzeko beharrezkoa den konpetentzia garrantzitsuenetakoa da sormena.

Bi eredu horiek uztartu dituzte joko sortzeko. Howard Gardnerrek proposatzen dituen zortzi adimenetatik bost aukeratu dituzte (enpatia, autoezagutza, komunikazioa, egoera larrien kudeaketa eta sormena) eta OMEn zerrendatik lau baliabide aukeratu dituzte (musikala, espazio-bisuala, linguistiko-berbala eta korporala). Jokalari bakoitzak autoebaluazio fitxa bat izango du, jokoaren amaieran bere gaitasunak zein diren aztertzeko. Jokorekin batera, etorkizunerako gida bat jasoko dute jokalariek, jakiteko beraien abilezia eta gaitasunen arabera zein lanbide egokitzen zaion hoberen etorkizunearan.

Howard Gardnerren inteligentziak:

-  **Inteligentzia musikala:** Musika formak hauteman, bereizi, eraldatu eta adierazteko gaitasuna.
-  **Inteligentzia espazio-bisuala:** Irudien bidez pentsatzeko eta ideiak grafikoki jartzeko gaitasuna.
-  **Inteligentzia linguistiko-berbala:** Hizkuntza modu egokian erabiltzeko gaitasuna. Ideiak edo sentimenduak ahoz edo idatziz adierazteko gaitasuna.
-  **Inteligentzia korporala:** Gorputzaren bidez ideiak eta sentimenduak adierazteko gaitasuna.



JOKOAREN NONDIK NORAKOAK


11-14 urte arteko gazteentzako sortu dute karta jokoa, baina nagusiagoek jokatzeko modukoa ere bada. Jokoa sinplea eta dinamikoa da, eta jokalariek euren burua ezagutzeaz gain, une dibertigarriak biziko dituzte. Bost jokalarik hamar txanda jokatzeko diseinatu dute, baina moldatzeko aukera dago.

104 karta, 104 erronka, 104 baliabide

Kartak bi multzotan bereizten dira: batetik, erronkak daude eta, beste aldetik, baliabideak. Jokalari bakoitzak karta bat hartuko du erronken multzotik, eta hor agertuko zaio gainditu beharreko erronka. Horretarako, lau karta aterako ditu beste multzotik, eta hor aterako zaizkio erronka hori gainditzeko baliabideak. Gutxienez baliabide bat eta gehienez hiru erabili ahal izango ditu erronka gainditzeko.

Jokoan zehar erabilitako baliabideak aztertzeke autoezagutza fitxa bat izango du jokalari bakoitzak. Baliabide bakoitzak kolore bat dauka. Neurgailu bat izango du fitxak, eta erabilitako baliabide kopuruak dagokion kolorez margotu beharko ditu jokalari bakoitzak. Autoebaluazio fitxa horri esker, jokalari bakoitzak modu bisual eta erraz batean ikusiko du zein motako abileziak erabili dituen gehien, eta horrek bere burua hobeto ezagutzen lagunduko dio.

Azkenik, karta jokoarekin batera, etorkizunera begirako gida bat ere aurkituko dute jokalariek, eta bakoitzak ikusi ahal izango ditu lan munduan dauden aukerak, bere abileziei lotuta.



TXANDA	■	+	-	▲	×
1					
2					
3					
4					
5					
6					
7					
8					
9					
10					

Bost inteligentzia ditu koadroak goiko lerroan, ezkerretik eskumara, eta goitik behera txandak daude zenbatuta. Inteligentzia bakoitzak hiru laukitxo ditu, jokalari bakoitzak gehienez hiru baliabide erabili ahal izango dituelako txanda bakoitzean. Baliabide bakoitzak kolore bat dauka, eta erabilitako kopuruaren arabera bete beharko dira goiko neurgailuak.

JOKOA ESKURATZEKO

Momentuz jokoa Internet bidez erosi daiteke, baina lanean ari dira fisikoki dendetan ere salgai jartzeko. Ikastetxeekin ere harremanetan jarri dira, eta eskoletan ere banatuko dute karta jokoa. 24 euroko prezioa dauka, eta behin erositara, autoebaluazio fitxak ere deskargatu daitezke webgunetik.






Jone Olaizola



zarak, maindireak edo mihi-seak. Zimurrak eta zimurdurak. Masaileko zimurrak edo bekokikoak. Printzipioz, zimurrak ez zaizkigu gustatzen. Gainera, zimurra zekenaren eta zikoitzaren sinonimoa ere ba omen da. Beraz, are konnotazio negatiboagoa dauka.

Urteekin azala zimurtzen zaigu eta hein berean, geure buruari mugak jartzen hasten gara: "Nire adinean nola hasiko naiz igerian ikasten, jada berandu da dantzan ikasteko, zaharregia naiz euskaltegia euskara ikastera joateko, etab."

Halako sineskeriak iltzatuta dauzkagu inkonszientean, eta kosta egiten da horri buelta ematea. Egia esan, esan esaten dute burmuinak gaitasuna galtzen duela adinarekin, baina nik zalantzan jartzen dut hori. Era berean, esaten dute gure nortasuna umetan finkatzen dela, baina hori ere ez zait sinesgarria egiten. Izan ere, adin horretan jada gure pertsonalitatea zehaztuta badago, 65 urterekin ume baten nortasuna dugula pentsa genezake, eta horrek beldur pixka bat ematen du. Psikologiako irakasle batek ikasleei horren berri eman zienean, ikasle bat kezkatuta hurbildu zitzaion. 19 urte zituela eta oraindik gauza asko aldatu nahi zituela esan zion ikasleak irakasleari, eta irakaslearen erantzuna nahiko etsigarria izan zen: 'Jada, berandu da!'. Kosta egiten da sinestea. Esanak esan, nik uste dut bizitza osoan zehar ikasten ari garela, eta horrelako usteek geure buruari aitzakiak jartzeko soilik balio dutela. Beraz, beldurrak uxatu eta animo denoi ikasturte berriarekin, ikasle gazte nahiz helduei!




Eire Vila

"Urteekin azala zimurtzen zaigu, eta hein berean, geure buruari mugak jartzen hasten gara"

Etxia, beti eskian:
 Etxeko gastuak inoiz amaitzen ez direla adierazteko.

Aurrerantzean Herriko Antzokiko webgunetik erosi ahal izango dira kultur emanaldietarako sarrerek eta ez dute komisiorik izango

Elgoibarko Herriko Antzokiko agenda jasoko du aurrerantzean *herrikoantzokia.eus* plataformak, eta sarrerek bertatik erosteko aukera egongo da. Lehen Kutzabank bidez erosi behar izaten ziren sarrerek, eta zerbitzuaren truke sarrera bakoitzeko komisioa ordaindu behar izaten zen. Hemendik aurrera, Udalak prestatu duen plataforma honi esker, sarrerek ez dute komisiorik izango. Hemendik abendura bitarteko kultur ekitaldien agenda kontsultatu daiteke dagoeneko: *Losers* izango da lehen ikuskizuna urriaren 22an, eta gaurtik aurrera eros daitezke sarrerek. Aitziber Garmendia eta Jon Plazaola dira *Losers* obrako aktore protagonistak; Sandra eta Manuel. Adinean aurrera doaz, ia 40 urte dituzte, eta adin horretara ailegaterako, gizarteak markatutako baldintzetatik ez dute bat bera ere betetzen: umerik ez dute, bikoterik ere ez, diruz urri dabilza eta ez dute etxebizitza bat erosteko aukerarik. Bakarti bizitzeari utzi nahi diote, goibel bizitzetik alai bizitzera. Covid 19aren azken protokoloan oinarrituta, Herriko Antzokiaren edukiera %75ekoa izango da aurrerantzean, eta ordutegiak ere, pandemiak aurrekoak izango dira. Hortaz, urriaren 22ko *Losers* antzezlanak 20:30ean izango da.



Aire libreko margo lehiaketa egingo dute bihar Mendaron

Aire libreko margo lehiaketa egingo dute bihar Mendaron, 9:00etatik aurrera. Formatoa, teknika eta euskarria artista bakoitzak aukeratu dezake, baina gaia Mendaro izango da; hau da, herriarekin zerikusia duen zerbait marraztu beharko da. Lanak 13:00etatik 14:00etara bitartean entregatu beharko dira, frontoian. Lau sari banatuko dituzte, eta lehenengo hiru postuetako margolanak Udalarrentzat izango dira. Lehen saria 700 eurokoa izango da, bigarrena 500 eurokoa eta hirugarrena 300 eurokoa. Laugarren saria herritarrentzako saria izango da, 300 eurokoa, eta margolan hori izango da herritarren artean egingo duten zozketarako saria. Gazteentzako saria margotzeko materiala izango da. Aukeraturako lanekin erakusketa osatuko dute, urriaren 1etik 10era, bariku, zapatu eta domeketan, 12:00etatik 14:00etara eta 18:00etatik 20:00etara Lagun Betikoenean.

Bulego taldearen kontzertua gaur, Herriko Antzokian

Kultura Eguzkitan egitasmoaren barruan, Bulego talde azkoitiarrak kontzertua emango du gaur, 19:00etatik aurrera. Hasieran Kalegoen plazan egitekoak ziren kontzertua, baina emanaldiak ikusmin handia sortu zuenez, Herriko Antzokira aldatzea erabaki zuen Kultura Sailak. Kontzertua doan da, baina sarrera behar da, aforoa kontrolatzeko. Herriko Antzokiaren edukiera %75era handitu dutenez, txarteldegian 100 bat sarrera egongo direla jakinarazi du Kultura Sailak.



Kale antzerkia bihar, Mendaron

Mesede bat egiteagatik antzezlanak ekarriko du Trapu Zaharra taldeak bihar, Mendaroko Herriko Enparantzara. Asier Sota eta Lierno Fresnedo izango dira aktoreak. Hautagai batek kanpaina hasi baino hamabost egun lehenago beldur eszeniko agerraldi bat jasango du, eta bere alderdia coach batekin jarriko da harremanetan. Ikusleek meeting bat simulatuko duen saio terapeutiko batean parte hartuko dute, ezer ez da dirudiena lemapean. 12:00etan hasiko da saioa.

Jendea kultura egarriz eta festa gogoz dela erakutsi du Gararock jaialdiak

Egun osorako euria emanda zegoelako kontzertuak plazan barik San Agustin aretoan izango zirela zabaldu zuten bezperan antolatzaileek, penatuta. Eta are pena handiagoz ziren zapatu arratsaldean, zientziak asmatu ez zuela ikusita. Baina *ger-tatzen dena, beti da onerako* dioen esaera bete egin zen. Kontzertuak barruan izan ziren, baina Garagarzako plazan ere sekulako giroa sortu zen.

Plazan jarri zuten food truck-a eta txosna, bai eta materiala saltzeko mahaiak ere. Etsipen halako bat ere nabari zen, hala ere, arratsaldean antolakuntza lane-tan ari zirenen aurpegi eta hitzetan. Plazan musika jarrita zuten, baina hutsik zen eszenatokia, eta haren ondoan pilatuta zituzten dozenaka aulki. Plazak zuen itxura eta egiten zuen eguraldia ikusita, pena zen barrura sartu beharra, kontzertuak jarrita eta musukoa jantzita entzun beharra. Baina ez zegoen besterik.

18:00etarako hasi zen plaza jendez betetzen, izan ere, 19:00etan zen hastekoa Arima taldearen kontzertua eta orduerdiretik hastekoak ziren antolatzaileek gonbidapen-sarrerak banatzen. Atzeratu zen dena apur bat, baina berdin zion, jendeak ez zuelako inolako presarik. Jai-giroaz gozatzen ari ziren musikazaleak. Arimaren kontzertua hasi zen gero, baina jaiak ez zuten etenik izan kanpoan ere. Arimaren ondoren, Amorantek bete zuen aretoa. Tronpeta eta joarea hartuta gurutzatu zuen Iban Urizarrek plaza, Akerbeltz, ume saldo bat eta musikazaleak atzetik zituela. Ordu-rako iluna eginda zegoen kanpoan, eta are itxura politagoa zuen plazak. Ordu-bete inguruko saioa eskaini zuen Amorantek. Bakarrik aritu zen kantu bat ez beste guztietan. Bakar horretan Ager Isunza, Audiencekoak, lagundu zion biolinarekin. Kontzertuari plazan eman zion azkena Amorantek, Patxi Zabaleta musikaria lagun hartuta. Sergio Gonzalez konpositorearen *El cuarto de Tula* kantua jo zuten, eta lehenaz gain, piztu zen giroa. Audience talde bizkaitarraren kontzertua hasterako, eguneko lehenengo euri tantak jausi ziren, eta deitu zuten barrura antolatzaileek. Bete egin zen aretoa eta borobildu zuen eguna Audiencek. *Tolesturak* azken diskoko piezak jo zituen batez ere, eta tartean, *Mendaro Fiddler* kantua ere jo zuten, Joseba Olazabal mendaroarrak hasitako borrokari eskainitakoa. Gaizka Isunza abeslariak oholtzara igotzera ere gonbidatu zuen Olazabal, eta txaloka hartu zuten proposamena aretoan bildutakoek.



Arg.: Juxe Areta Goñi



Arg.: Alessandra De Schmidt

Hugo Aznar nafarrak irabazi du Valentín Romeraren Oroimenezkoa



Hugo Aznar Vijuesca nafarrak (Quesos Albeniz) irabazi zuen zapatuan Mintxetan hasi eta

amaitu zen Valentín Romeraren Oroimenezkoa. Tropeletik ihes egin eta bakarrik helmugaratu zen Cortesko txirrindulari gaztea. Aznarrek Gipuzkoako Junior Itzuli entzutetsua irabazi zuen ekain bukaeran, segundu-ehuneneko batzuen aldeagatik. Elgoibarren garaipen argiagoo eskuratu zuen, 18 segundoko aldea atera baitzion helmugan bigarren postuan sailkatu zen Ibai Azanza Buruscori (Beola Motor) eta minutu eta zortzi segundu sartu zizkion hirugarren egin zuen Owen Lighfoot (Velo Club Rutland) txirrindulari britaniarrari. Guztira 68 txirrindularik lortu zuten proba bukatzea. Sakanako Quesos Albeniz talde nafarrak irabazi zuen taldekako sailkapena. Etxeko txirrindulariei dagokionez, Elgoibarko Lagun Taldeako bost txirrindularik hartu zuten parte lasterketan, horietako hiru oraindik kadete mailakoak diren arren. Beñat Fernández Loiolak eskuratu zuen posturik onena. Fernandezek bederatzigarren postuan gurutzatu zuen helmuga, irabazle-arengandik 1:51ra. Jokin Amorrosta Arriolak ere lan oso ona egin zuen, eguneko ihesaldi garrantzitsuenan sartzea lortu baitzuen honek ere. 19. postuan sailkatu zen. Kadete mailako txirrindulariek igarri zuten koska handia dagoela maila bat eta bestearen artean. Eneko Ortegak ez zuen zortea alde izan eta matxura batek joko kanpo laga zuen. Era berean, Aitor Arranzek eta Aritz Esnaolak ere ezin izan zuten proba bukatu. Antolatzaileak pozik daude lasterketan parte-hartze handia izan zelako eta "maila handiko" proba izan zelako. Proba antolatu ahal izateko laguntza eman dien boluntario eta laguntzaile guztiei eskerrak eman dizkiete Lagun Taldeako arduradunek. Era berean, Jokin Amorrostari eta Beñat Fernandezi zortetik onena opatu diete aurki hasiko duten etapa berrirako, junior izateari lagako baitiote denboraldi amaieran.

Garaipen batekin hasi du liga Gaurve Asesores taldeak



Aurreko asteburuan hasi zen Emakumeen Zilarrezko Ohorezko Mailako liga txapelketa eta Sanloko emakumezkoen talde nagusiak ezin hobeto hasi zuen txapelketa. Elgoibartarrek 21-28 irabazi zuten Helvetia Anaitasuna taldearen aurka Iruñean jokaturako partida. Bigarren jardunaldian etxean jokatu du Gaurve Asesoresek, Kantabriako Uneatlantico Unicaja Banco taldearen aurka. Zapatu honetan, hilaren 25ean, izango da neurketa, 19:30ean, Olaizagan.

Haundiren bigarren berdinketa eta emakumeen garaipen argia

C.D. Elgoibarreko zazpi taldek jokatu zituzten ligako partidak aurreko asteburuan, hiruk etxean eta kanpoan gainerakoek. Haundik Erreterian jokatu zuen ligako bigarren partida eta bana berdindu zuen Touring taldearen aurka. Ligako lehen jardunaldian ere husna berdindu zuen Haundik Udaren arteko neurketa. Emakumeen talde nagusiak indartsu hasi du liga txapelketa, 0-7ko emaitzarekin irabazi baitzion Euskaldunari, Andoaian jokaturako partidari. Erregionalak ere garaipen argi batekin hasi zuen liga, Mintxetan, Aretxabaletari 3-0 irabazita. Eta beste horrenbeste Ohorezko mailan diharduen jubenilen taldeak, 2-0 irabazi baitzioten Mondrari. Lehen mailako kadeteek ere 5-1 irabazi zuten Mintxetan, Bergararen aurkako partida. Aldiz, jubenilen 1. mailako taldeak eta ohorezko kadeteek ezin izan zituzten etetik kanpo jokatu zituzten partidak irabazi. Jubenilek 3-1 galdu zuten Urkiren aurka, eta kadeteek 3-2 Arrasateren aurka.



Beteranoentzako Espainiako Judo Txapelketa irabazi du Egoitz Morak



Judoka beteranoentzako Espainiako Txapelketa jokatu zuten asteburuan Villares de la Reinan (Salamanca, Espainia), eta urrezko domina eskuratu zuen Egoitz Mora Ulaziak. Judoka elgoibartarra 100 kiloz gorakoen kategorian lehiatu zen Euskadiko selekzioa ordezkatzuz, eta garaipen argia lortu zuen, jokatu zituen hiru borrokaldiak ippon bidez irabazita. Euskadiko eta Asturiasko ordezkariak gainditu zituen lehenengo, eta finalean Valentziako ordezkari Francisco Ferri Sarriori irabazi zion. Honakoa ez da Morak irabazten duen aurreneko titulua, ezta bere ibilbidean lortu duen garrantzitsuena ere, baina berezia izan da 39 urteko judokarentzat, belauneko barne lotailu gurutzatua apurtu zuenetik jokatu duen aurreneko txapelketa izan baita. 2018ko Euskadiko Judo Txapelketako finalerdietako borrokaldian hautsi zituen lotailuak. "Ukituta joan nintzen txapelketa hartara, belaunean zerbait gaizki zegoela igaritzen bainuen. Lotailuak hautsi eta gero, operatu gabe errekuperatzea erabaki nuen, eta bidea luzea izan bada ere sentsazio onekin itzuli naiz beteranoentzako txapelketa honetatik, ondo ikusi dut nire burua. Kanpotik ere hala ikusiko ninduten, beteranoentzako Munduko Txapelketara joateko esan didatelako, baina oraingoz ez da hori nire asmoa. Ekainean hasi nintzen berriro entrenatzen eta abuztuan egin ditut txapelketa honetarako entrenamenduak. Lehen egunak oso gogorrak izan zirela aitortu beharra dut; horrenbeste denbora geldik egon izanagatik eta maskararekin aritu beharragatik, besteak beste". Txapelketetan lehiatzen jarraitzeko asmoa du Morak. Gipuzkoako eta Euskadiko judo txapelketa nagusietan parte hartuko du, urrian eta azaroan, hurrenez hurren.

Xake Eskolak Mendaron zein Elgoibarren

Zubiondo Xake Taldea umeentzako xake eskolak ematen hasiko da urritik aurrera. Astelehen eta asteazketan izango dira klaseak, 18:00etatik 19:00etara. Beste saio bat ere jarriko dute aukeran, astearte edo ostegunetan izango da, hori ere 18:00etatik 19:00etara. Iker Ruiz eta Mikel Leon izango dira xake irakasleak. Interesatuak honako telefono zenbata idatzi behar dute whatsapp izena emateko: 637 737 113 (Mikel). Era berean, Mendaroko Otarre Xake Taldeak ume zein helduentzako xake klaseak emango ditu, Azpilgoetako Kultur Aretoan. Helduentzako klaseak hartzeko 25 euro ordaindu beharko dira urtean. Umeek, (1H3tik aurrerakoak hartuko dituzte), 10 euro ordaindu beharko dituzte ikasturte osorako. Izena emateko eta informazio gehiagorako: 653 715 375.



Abian da Elgoibarko Kirol Argazkien XVII. Lehiaketa

Aurtengoa lehiaketaren XVII. ekitaldia da, eta Elgoibarko Udalak (Haur, Nerabe eta Gazteen Sustapen Saila eta Kirol Patronatua) eta Ongarri argazkilari elkarteak antolatu dute elkarlanean. Lehiaketa udatik udazkenera atzeratu dute, parte-hartzaileek argazkiak egiteko kirol ikuskizun, lehiaketa eta ekintza gehiago izango dituztela uste baitute antolatzaileek. Interesa duen orori dago zuzenduta, haur, gazte zein nerabe, profesional edo zaletu orori, baina gai nagusia, noski, kirola izango da, bere arlo zein modalitate guztietan. Lanak Olaizaga kiroldegian aurkeztu beharko dira (32. posta kutxatilan) azaroaren 26rako. Argazki bakoitzaren atzean izenburua edo leloa eta zein mailatara (herritarrak, gazteak, orokorra) aurkezten den adierazi beharko da, eta horrekin batera, partaidearen datuak kartazal baten barruan.



LANA.....

Eskaerak

Lan bila nabil. Etxeetan garbiketa lanak egiten esperientzia daukat.

☎ 633 294 339 (Cinthya)

Adinekoak zaintzeko prest nago, asteburuetan edo etxeko langile moduan.

☎ 631 425 686 (Laura)

Adinekoak edo umeak zaintzeko eta garbiketa lanak egiteko prest nago, orduka.

☎ 631 229 408

Orduka lan egiteko prest nago.

☎ 631 887 341 (Maribel)

Adinekoak zaintzeko eta garbiketa lanak egiteko prest nago. Orduka, asteburuetan edo etxeko langile moduan.

☎ 612 270 162

Adinekoak zaindu edo garbiketa lanak egingo nituzke. ☎ 640 742 618

Lan bila nabil. Soldadura ikasketak eginda dauzkat. ☎ 632 508 182

Adinekoak zainduko nituzke, etxeko langile moduan. Esperientzia daukat.

☎ 612 462 120

Eguerditik aurrera, adinekoak zaintzeko eta garbiketa lanak egiteko prest. Esperientzia daukat.

☎ 602 490 595

Edozein lan egiteko prest nago.

☎ 693 967 256 (Patricia)

Adinekoak zaindu edo garbiketa lanak egingo nituzte. Orduka. Euskalduna naiz.

☎ 626 49 09 86

Adinekoak zaindu edo garbitzaile lanak egiteko prest nago, orduka nahiz lanaldi osoz. Baita etxeko langile moduan aritzeko ere. ☎ 632 116 534

Edozein lan egiteko prest nago. Sukalde laguntzaile lanetan eta adinekoak zaintzen esperientzia.

☎ 643 071 900

Adinekoak zaintzeko eta garbiketa lanak egiteko prest nago. Orduka edo etxeko langile moduan.

☎ 641 821 288

Eskaintzak

Goizetan 6 urteko bi ume Herri Eskolara eramateko pertsona behar da.

☎ 634 599 864

Asteburu eta jai egunetan jabetxe batean lan egiteko zerbitzaria behar da.

☎ 659 539 861

ETXEBIZITZAK.....

Bi gelako buhardilla txiki bat alokatzen dut.

☎ 660 042 159 (arratsaldez deitu)

BESTELAKOAK.....

Eskalatzeko sokak hartuko genituzke Elgoibarko Izarran. 943 74 16 26 / atxutxiamaika@elgoibarkoizarra.eus

Estimu handia diodan betaurrekoentzako estutzea galdu nuen abuztuan San Roken, Norbaitek izango balu eskertuko nuke bertan agertzen den telefono zenbakira deitzea.

☎ 674 834 352


 <p>Consejo Vasco de Colegios de Administradores de Finanzas Euzkoaldea Herriko Administrazioaren Kontseilua</p>  <p>ROSA Ma PINTADO</p> <p><i>Etxaldean Administrazioarako-Gradu ikasketen arduraduna Alcala de Henareseko Unibertsitatean, eta Gipuzkoa, Bizkai eta Arabako, Errioxako eta Kantabriako ikastetxeetan. Zuzenbidean lizentziatua. Kolegiatu zenbakia: 749</i></p> <p>660 969 679 rosapf@telefonica.net</p>	<p>Zor duen hileko kuota ari gatzaizkio erreklamatzeko gure komunitatean lokal jabe bati. Hainbat aldiz hitz egin ostean, adostasun batera iritsi gara bi aldeak, eta zordunak agindu du urtebeteko epean ordainduko duela zor duen diru kopuru hori. Jakin nahiko nuke komunitateak eskumenik ote duen zordunari zor duen diru guztia ordainketa bakarrean ordainarazteko. Izan ere, etxejabe batzuek ez daude konforme ordainketa horrenbeste atzeratzearekin.</p> <p>Komunitateak aukera dauka zor osoa aldi bakar batean ordaintzea exijitzeko, beti ere, bi aldeek ez baldin badute ordainketa sistema jakin bat adostu. Dena den, komunitate horretako jabe guztiek ez dute zertan onetsi bi aldeek adostutako ordainketa sistema. Akordioek helburu bakarra dute: epaiketara jo beharra saihestea zordunari kuota ordain dezan exijitzeko edo hasitako auzibidea amaitzeko. Legeak dio komunitateko gastuak jabeekideen batzarrean adostutako moduan eta epeetan ordaindu behar direla. Bestela, presidenteak edo administratzaileak epaiketara jotzeko aukera izango luke, beti ere jabeekideen batzarrak hala adostuz gero.</p> <p>AHOLKUA: zor duen guztia ordaintzeko exijitu diezaioke etxejabeen batzarrak zordunari, eta hark ordainduko ez balu, batzarrak aukera izango luke epaitegira jotzeko eta auzibidea hasteko.</p> <p>ASESORIA GO/R AHOLKULARI KOLABORATZAILEA San Bartolome, 2</p>
-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------	-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------



Argazkiak eguzten eguerdia (12:00ak) baino lehen ekarri behar dira BARRENEKO bulegora, barren@elgoibarkoizarra.eus e-postara edo 📞 688 634 044 bidalita.



Zorionak, **Ai-
nere!** 8 urte
handi beteko di-
tuzu! Patxo handi
bat, familia guztiar-
ren partez.



Zorionak, **Mar-
kel,** asteartean 4
urte bete zenitue-
lako. Familia guz-
tziaren partez,
muxu asko!



Zorionak, **Hai-
zea,** 14 urte egin
dituzulako. Etxeko
guztion partez,
muxu bat.




Zorionak, **Nora,**
igandean 10 urte
beteko dituzulako.
Muxu eta besar
kada handi bat,
etxekoen partez.



Zorionak,
Naroa! Gaur
11 urte bete di-
tuzu! Oso ondo
pasa eguna! Fa-
miliakoen partez.



10 urte, **Luken!**
Zure zenbaki gus-
tokua! Martitze-
nian hasi eta
asteburuan
emango diegu
errematia ospaki-
zunei, Nafarroan.
Zorionak!



Zorionak, **bikote!** Iritsi da zuen eguna,
eta gu zuekin topera gozatzeko prest
gaude. Muxu handi bat kuadrillakoen
partez.



Zorionak,
Ixaso, irailaren
30ean 8 urte be-
teko dituzulako.
Etxekoen, eta be-
reziki, Kairen par-
tez. Muxu handi
bat! Ondo pasa!

Erretratu bakarrekogurra: 4'50€ Argazki bikoitza: 7€. Hirukoitza: 9€. Hiru lagunetik gorako taldeak: 15€

ELGOIBARKO IZARRAKO BAZKIDEENTZAKO PREZIOAK
Erretratu bakarrekogurra: 3'50€. Argazki bikoitza: 6€ Hirukoitza: 8€ . Hiru lagunetik gorako taldeak: 12€

KIMA
BIOTZETIKA

Hitzordua hartekoa: 646 563 706

Depilazio hobereenerako, espezialistarik onenak

TRIPHASE

Urzandi 9, behea - Elgoibar - www.kimabioestetika.webkoibox.com

TRIPHASE
NEODIMIOA EN LINO

Hiru sistema batean

Neodimioa
Eraginkorra ile ilanean, azal argian edo gaztaina-kolorekoan

Diodoa
Eraginkorra ile finean eta larru oso beltzarenetan

APL
Eraginkorra da mota guztietako ileetan eta beltzarandu gabeko larruzanetan

VEGAN

Jarri ezazu zure publizitatea BARREN astekaritan edo www.barren.eus webgunean

943 743 704
688 769 657

barren.publi@elgoibarkoizarra.eus
Aita Agirre Kulgunea, 3. 3. ezk. - 20870 ELGOIBAR

BARREN

EXPRESS ESKAINTZAK!

AEG BPS351120M LABEA

465 €

- Funtzio anitzekoa. 10 eginkizun.
- LDC pantaila
- XXL haizagailua.
- A+ energia mota
- Pirolitikoa
- Aztamen kontrako INOX
- LURRUN erantsia zaporea, testura eta kolorea hobetzeko.

MILARBIRE

Ubitarte, 11 - 943 741 487 - bire@milar.es
Dendako prezioak. Produktuak agortu arte.

24 BARIKUA

16:30 Odol ateratzeak, Elgoibarko jubilatuen Biltokian. Txanda hartzeko: 623 328 408

19:00 Zine foruma: 'La modista'. Hai-zeak antolatuta, Loredi Salegik gida-tuko du. Lila Emakumeen Etxean.

19:00 Kontzertua: Bulego. Kultura Eguzkitan egitasmoaren barruan, He-rriko Antzokian. Gonbidapena behar da.

25 ZAPATUA

9:00 Azken zapatuko feria. Elgoi-barko baserrietako produktuak jarriko dituzte salgai, Kalebarren plazan. Eguerditik aurrera, ganadu feria, Aita Agirren.

9:00 Kaleko margo lehiaketa. Men-daron. Sari banaketa 14:30ean, Go-ñati frontoian.

10:00 Alzheimerren Mundu Eguna-ren harira, informazio mahaiak jarriko dituzte.

11:00 Gastronomia eta tokiko merka-taritzaren balioesteko tailerra: 'Sukaldari-tza sortuz'. 7-12 urte bitarteko umeentzat. Aita Agirre kulturagunean.

12:00 Kale antzerkia: 'Mesede bat egiteagatik'. Mendaroko Herriko Enpa-rantzan.

27 ASTELEHENA

18:00 Emakumeentzako Jabekuntza Tailerra: "Estereotipoak deseraikitzen". Loredi Salegik gidatuko du saioa. Lilan. Doan.

Iñaki Agirre zinemaldia (Herriko Antzokian)

'Queridos camaradas'
24 barikua: 21:00



'La mujer del espía'
25 zapatua: 19:00 / 22:15
26 domeka: 19:00
27 astelehena: 21:00



Botika ordutegiak 09:00 - 13:00 / 16:00 - 20:00

GUARDIAK

Egunez: 09:00-22:00

Iluntzean: 20:00-22:00

Larunbatak: 9:00-14:00 (*)

24 BARIKUA	25 ZAPATUA	26 DOMEKA	27 ASTELEHENA	28 MARTITZENA	29 EGUAZTENA	30 EGUENA	1 BARIKUA
Egunez Arriola	Egunez *Fernandez *Garitaonandia	Egunez *Fernandez	Egunez Yudego	Egunez *Oruesagasti	Egunez Barrenetxea	Egunez *Ibañez	Egunez Garitaonandia
Iluntzean Arriola	Iluntzean ---	Iluntzean ---	Iluntzean Yudego	Iluntzean Yudego	Iluntzean Barrenetxea	Iluntzean Barrenetxea	Iluntzean Garitaonandia

* Fernandez:
Herriko Enparantza, 4
Garagartza (Mendaro)
943 756 142

* Ibañez:
Rekalde, 1 (Soraluze)
943 751 638

* Oruesagasti:
Kalebarren, 9 (Soraluze)
943 751 384

Urte guztian, gauz: 22:00-09:00
Arantzazu Izpizua, Ibarkurutze, 7 (Eibar)
943 201 912



TERTULIAK programa

euskaraz berba egiteko beste aukera bat

Astean ordubete, urritik ekainera, dakizuna hobetzeko eta ez dakizuna ikasteko.
Eta gainera, doan! Euskaraz jarduteak ez daukalako preziorik.

Animatu eta eman izena urriaren 8a baino lehen!

Izena emateko eta informazio gehiago:

Elgoibarko Izarra (943 741 626) / elgoibarkoizarra@elgoibarkoizarra.eus

AEK euskaltegia (607 601 423) / elgoibar@aek.eus

Udal Euskaltegia (943 742 731) / udaleuskaltegia.elgoibar@debabe.eus



Utzi galderak egiteari eta hasi gidatzen.

Kiaren gama elektrifikatua.



Movement that inspires

Gama elektrifikatu zabala daukagu Kian, zure beharrei erantzuteko ezin egokiagoa. Aukeratu zuri ondoen datorkizun eredu elektrifikatua, Kiaren 10 konpromisoek ematen duten lasaitasunarekin. **Eta orain, MOVES III Planaren abantaila denekin.**

KIA
NAIA CAR

📍 Apalategi, 1 EIBAR

☎️ 943 707 033 🌐

HEV: CO2 emisio konbinatuak WLTP (g/km): 110-169, Kontsumo konbinatua WLTP (l/100 km): 4,8-7,4, PHEV: Co2 emisio konbinatu ponderatuak WLTP (g/km): 29-38, Kontsumo konbinatu ponderatua WLTP (l/100km): 1,3-1,7, EV: Kontsumo konbinatua WLTP (kWh/100 km): 15,3-15,9, CO2 emisioak WLTP (g/km): 0, Kontsultatu MOVES III Planaren baldintzak www.kia.com-en. *Kontsultatu KIAren bermeen esku-ormia. **Kontsultatu Kia-ren 10 konpromisoak www.kia.com-en.

10 Kia** konpromisoak

